

洞玄靈寶天尊說十戒經

天尊言善男子善女人能發自然道意來入法門受我十戒十四持身之品則為大道清信弟子皆以勇猛飛天齊功於此時進心不懈退者即超凌三界為上清真人

一者不殺當念眾生二者不得妄作邪念三者不得取非義財四者不欺善惡反論五者不醉常思淨行六者宗親和睦無有非親七者見人善事心助歡喜八者見人有憂助威作福九者彼來加我志在不報十者一切未得我不有望

次說十四持身之品

與人君言則忠於國與人父言則慈於子與人師言則愛於眾與人臣言則忠於上與人兄言則友於弟與人子言則孝於親與人友言則信於交與人夫言則和於室與人婦言則貞於夫與人弟言則恭於禮與野人言則勤於農與賢人言則志於道與異國人言則各守其域與奴婢言則慎於事

天尊言曰修奉清戒每合天心常行大慈願

為一切普度危世謙謙尊教不得中怠寧守善而死不為惡而生於是不退可得拔度五道不履三惡諸天所護萬神所敬長齋奉戒自得度世而為偈曰

一切修學人 誓願成真道 慈悲念戒文 道聲斷煩惱

洞玄靈寶天尊說十戒經